



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË  
DHËNAVE PERSONALE

DREJTORIA PËR TË DREJTËN E INFORMIMIT

Nr. 1518 / Prot  
14

Tiranë, më 24/12/2020

VENDIM

Nr. 57 , datë 24 . 12 . 2020

PËR

URDHËRIMIN E AUTORITETIT PUBLIK

Në mbështetje të nenit 23 të Kushtetutës së Republikës së Shqipërisë, pikës 3 dhe 5 të nenit 24, të ligjit nr. 119/2014 “Për të drejtën e informimit”, shkronjës a) të nenit 31/1 të ligjit nr. 9887, datë 10.03.2008 “Për mbrojtjen e të dhënave personale” i ndryshuar,

KONSTATOVA SE:

Ankuesi, Qendra “Res Publica”, përfaqësuar nga z. \_\_\_\_\_, ka depozituar pranë Zyrës së Komisionerit për të Drejtën e Informimit dhe Mbrojtjen e të Dhënave Personale (në vijim “Komisioneri”) Formularin e Ankesës nr. 1518 Prot., datë 04.12.2020, me objekt “Ankim ndaj refuzimit për dhënie informacioni dhe kopje të dokumenteve zyrtare”, kundër Autoritetit Publik “Ministria e Shëndetësisë dhe Mbrojtjes Sociale” (në vijim “Autoriteti Publik”).

Ankuesi, në cilësinë e kërkuesit, nëpërmjet kërkesës datë 02.11.2020, depozituar në adresën [Nexhila.Kodra@shendetesia.gov.al](mailto:Nexhila.Kodra@shendetesia.gov.al), ka kërkuar të informohet në lidhje me:

1. A përfshihen edhe testimet për Covid-19 të bëra në laboratorët private në të dhënat ditore që raportohen për testimet dhe rastet pozitive?
2. Nëse raportohen, sa është numri i testeve të bëra nga laboratorët private për Covid-19 për javën e fundit të muajit Tetor 2020?
3. Sa është numri i personave të testuar (jo numri i testeve) për javën e fundit të muajit Tetor 2020?

Në mungesë të një përgjigje nga Autoriteti Publik, me pretendimin se është cënuar në të drejtën për informim, ankuesi ka paraqitur ankim pranë Komisionerit duke i kërkuar ushtrimin e kompetencave që i njej ligji për rastet e refuzimit të dhënies së informacionit.

Komisioneri, pas shqyrtimit paraprak të ankesës, bazës ligjore dhe rrethanave të faktit të paraqitura në të, vlerësoi se ankesa përmbush kriteret formale ligjore, në përputhje me përcaktimet e nenit 24 të ligjit nr.119/2014 “Për të drejtën e informimit” (në vijim “LDI”).

Në ndjekje të procedurës për shqyrtimin administrativ të çështjes, si hap paraprak përpara marrjes së vendimit, në përputhje me nenin 10 të ligjit nr. 44/2015 “Kodi i Procedurave Administrative i Republikës së Shqipërisë”, i cili parashikon: “*Organi publik siguron që të gjitha palët dhe persona të tjerë të përfshirë në procedurë të jenë në gjendje të ndjekin dhe të mbrojnë të drejtat dhe interesat e tyre ligjorë në mënyrë sa më efektive dhe të lehtë të jetë e mundur*”, dhe nenin 31/1c të ligjit nr. 9887, datë 10.03.2008 “Për mbrojtjen e të dhënave personale”, i ndryshuar, Komisioneri me shkresën nr. 1518/1 prot., datë 07.12.2020 kërkoi nga Autoriteti Publik vlerësimin e dhënies së informacionit.

Koordinatorja për të drejtën e informimit, me e-mail-in datë 18.12.2020, ka informuar Zyrën e Komisionerit, se me shkresën nr.5428/1 Prot., datë 11.12.2020, Autoriteti Publik ka thyer përgjigje duke sqaruar se: “*...Në të dhënat ditore që raportohen për testimet dhe rastet pozitive përfshihen edhe testimet për Covid-19 të bëra në laboratorët private, sipas rastiit dhe faktit nëse këto subjekte kanë kryer teste në ditën përkatëse referuese. Në zbatim të Urdhrit nr. 437, datë 23.07.2020 të Ministrisë së Shëndetësisë dhe Mbrojtjes Sociale “Për Miratimin e Procedurës së Kryerjes së testeve molekulare RT-PCR për Sars-Cov2 dhe njohjes së laboratorëve jopublikë për kryerjen e testimit për nevoja administrative”, numri i testeve të bëra nga laboratorët jopublikë për Covid-19 për javën e fundit të muajit Tetor 2020, sipas referimeve përbën përrreth 5.7 % të totalit të testeve të kryera nga këto laboratorë. Për pikën 3 të kërkesës, me shkresën nr.4957 Prot., datë 06.11.2020, kërkesa është përcjellë për trajtim pranë Institutit të Shëndetit Publik.”*

Ankuesi, duke e konsideruar të paplotë përgjigjen e sipërcituar, ka vijuar me ankimin nr.1518/2 prot., datë 22.12.2020, pranë Zyrës së Komisionerit, duke kërkuar ndjekjen e mëtejshme të procedurave në përputhje me LDI vetëm për pikën 2 të kërkesës për informacion, me pretendimin se: “*...Në përgjigjen e tij, Autoriteti Publik, informon në lidhje me pikën e parë të kërkesës ndërkohë për pikën e dytë i referohet vetëm përqindjes së testeve të kryera nga laboratorët jo publikë, përgjigje e cila nuk plotëson kërkesën.”*

Komisioneri, pavarësisht vështirësive të hasura për shkak të problematikave të krijuara nga COVID 19, për kthimin e përgjigjes brenda afatit ligjor, nuk përjashton në asnjë rast Autoritetin Publik nga detyrimi për të ushtruar veprimtarinë e tij në lidhje me transparencën.

Bazuar në sa më sipër, pas konsultimit të legjislacionit përkatës dhe dokumentacionit të administruar gjatë procesit të hetimit administrativ, vlerëson se, përgjigja e Autoritetit Publik nuk është në përputhje me kërkesën për informacion të datës 02.11.2020.

Nga hetimi administrativ rezultoi se, në lidhje me pikën e dytë të kërkesës për informacion, Autoriteti Publik ka vendosur në dispozicion informacionin e shprehur në

% Informacioni i dhënë në këtë formë nga Autoriteti Publik nuk është i kuptueshëm, pasi kërkuesi, ka kërkuar të informohet specifikisht mbi *numrin e testeve të bëra nga laboratorët private për Covid-19 për javën e fundit të muajit Tetor 2020*. Në këtë kuptim, detyrimi për informim lidhur me këtë pikë konsiderohet i papërbushur nga Autoriteti Publik.

Komisioneri, vlerëson se, informacioni i kërkuar në pikën 2 të kërkesës për informacion, përbën informacion publik në kuptim të pikës 2 të nenit 2 të LDI në të cilën parashikohet se, *“informacion publik” konsiderohet çdo e dhënë e regjistruar në çfarëdo lloj forme dhe formati, gjatë ushtrimit të funksionit publik pavarësisht nëse është përpiluar ose jo nga Autoriteti Publik*” dhe rrjedhimisht i duhet vënë në dispozicion kërkuesit.

Ekzistenca e informacionit të mësipërm, pavarësisht nëse ai është i prodhuar apo administrohet nga Autoriteti Publik, ngarkon me përgjegjësi këtë të fundit për vënien në dispozicion të tij kërkuesit.

Në këto kushte, në lidhje me ankesën e Qendrës “Res Publica” ndaj Autoritetit Publik/Ministria e Shëndetësisë dhe Mbrojtjes Sociale, Komisioneri vlerëson se ankesa është e bazuar në ligj dhe si e tillë ajo duhet pranuar.

Bazuar në pikën 3 të nenit 3 të ligjit sipërcituar, *“Çdo person ka të drejtë të njihet me informacionin publik, nëpërmjet dokumentit origjinal ose duke marrë një kopje të tij në formën ose formatin që mundëson akses të plotë në përmbajtjen e dokumentacionit”*.

E drejta për informim është një prej të drejtave themelore të njeriut, e parashikuar në nenin 23 të Kushtetutës së Republikës së Shqipërisë. Kjo e drejtë duhet parë e lidhur ngushtë me parimin e transparencës dhe llogaridhënies, si një shtyllë tjetër themelore e shtetit të së drejtës. Funksionimi i tyre do të ishte në interesin e të dy palëve.

## **PËR KËTO ARSYE**

Bazuar në shkronjat b) dhe ç) të pikës 5 të nenit 24, nenit 25 të ligjit nr. 119/2014 “Për të drejtën e informimit”, shkronjën a) të pikës 1 të nenit 18 të ligjit nr. 49/2012 “Për organizimin dhe funksionimin e gjykatave administrative dhe gjykimin e mosmarrëveshjeve administrative” i ndryshuar,

## **V E N D O S A:**

1. Pranimin e ankesës nr. 1518 Prot., datë 04.12.2020 të Qendrës “Res Publica”, kundër Autoritetit Publik “Ministria e Shëndetësisë dhe Mbrojtjes Sociale”, me objekt *“Ankim ndaj refuzimit për dhënie informacioni dhe kopje të dokumenteve zyrtare”*.
2. Urdhërimin e Autoritetit Publik, për vënien në dispozicion të dokumentacionit të kërkuar në pikën 2 të kërkesës për informacion datë 02.11.2020, konkretisht: *(2. Nëse raportohen, sa është numri i testeve të bëra nga laboratorët private për Covid-19 për javën e fundit të muajit Tetor 2020)*, brenda datës 06.01.2021.

3. Kundër këtij vendimi palët kanë të drejtën e ankimit në Gjykatën Administrative të Shkallës së Parë Tiranë, brenda 45 ditëve nga marrja dijeni, sipas nenit 25 të ligjit nr. 119/2014 “Për të drejtën e informimit”.
4. Ky vendim u shpall sot në datë 24.12.2020.

**KOMISIONERI**

**Besnik Dervishi**

